

水經第三十二

漢 桑 欽 撰

後魏 酈 道 元 注

明 吳 瑄 校

澠水 蘄水 泐水 泚水

泄水 肥水 施水 沮水

漳水 夏水 羌水 涪水

潼水 涔水

澠水出江夏平春縣西

澠水北出大義山南至厲鄉西賜水入焉水源東

水經 卷之三十二

一

出大紫山分爲上水一水西逕厲鄉南水南有重

山卽烈山也山下有一穴父老相傳云是神農所

生處也故禮謂之烈山氏水北有九井子書所謂

神農旣誕九井自穿謂斯水也又言汲一井則衆

水動井今堙塞遺迹髣髴存焉亦云鄉故賴國也

有神農社賜水西南流入于澠卽厲水也賜厲聲

相近宜爲厲水矣一水出義鄉西南入隋又注澠

澠水又南逕隋縣注安陸也

南過安陸入于澠

蘄水出江夏蘄春縣北山

山卽近柳也水首受希水枝津西南流歷蘄山出蠻中故以此蠻爲五水蠻水卽謂巴水也又赤亭慶之於西陽上下誅伐蠻夷卽五水蠻也

南過其縣西

晉改爲蘄陽縣縣從江州置大陽成後齊安郡移治於此也

又南至蘄口南入于江

蘄水南對蘄陽州入于大江謂蘄口洲上有蘄陽縣徙

水經

卷之三十二

二

決水出廬江雩婁縣南大別山

俗名之爲檀山峴蓋大別之異名也其水歷山委注而絡其縣也

北過其縣東

縣故吳也春秋左傳襄公二十年楚子秦人侵吳及雩婁聞吳有備而還是也晉書地道記云在安豐縣之西南卽其界也故地理志曰決水出雩

又北過安豐縣東

決水自雩婁縣北逕雞備亭春秋昭公二十三年吳敗諸侯之師于雞父者也安豐縣故城今邊城

郡治也王莽之美風也世祖建武八年封大將軍涼州牧竇融爲侯國晉立安豐郡決水自縣西北流逕蓼縣故城東又逕其北漢高帝六年封爲孔侯國也世謂之決水也水又西北灌水注之其水導源廬江金蘭縣西北東陵鄉太蘇山卽注水也許慎曰出雩婁縣俗謂之澮水也楮先生所謂神龜出于江灌之間嘉林之中蓋謂此水也灌水東北逕蓼縣故城西而北注決水也故地理志曰決水北注蓼入灌灌水於蓼亦入決春秋宣公八年冬楚公子滅舒蓼臧文仲聞之曰臯陶庭堅不祀

水經

卷之三十二

三

忽諸德之不逮民之無援哀哉決水又北右會陽泉水水受決水東北流逕陽泉縣故城東故陽泉鄉也漢靈帝中封太尉黃琬爲侯國又西北流入決水謂之陽泉石也

又北入于淮

俗謂之決口非也斯決灌之口矣余往因公至于淮津舟車所届次于決水訪其民宰與古名全違脉水尋經方知決水蓋灌澮聲相倫習俗害真耳泚水出廬江灆縣西南霍山東北

灆者山水名也開山圖灆山圍繞大山爲霍山郭

景純曰灑水出焉縣卽其稱矣春秋昭公二十七年吳因楚喪圍灑是也地理志曰泚水出泚山不言霍山泚字或作淠水又東北逕博安縣泄水出東北過六縣東

淠水東北右會躡鼓川水水出東南躡川西北流左注淠水淠水又西北逕馬享城西又西北逕六安縣故城西縣故咎陶國也夏禹封其少子奉其祀今縣都陂中有大冢民傳曰公琴者卽臯陶冢也楚人謂冢爲琴矣漢高帝元年別爲衡山國五年屬淮南文帝十六年復爲衡山國武帝元狩二

水經

卷之三十二

四

年別爲六安國王莽之安風也漢書所謂以舒屠六晉太康三年廬江郡治淠水又西北分爲二水出焉又北逕五門亭西西北流逕安豐縣故城西晉書地道記安豐郡之屬縣也俗名之曰安城矣又北會濡水亂流西北注之

北入于淮

水之決會謂之泚口也

泄水出博安縣

博安縣地理志之博鄉縣也王莽以爲楊陸矣泄水自縣上承北水於麻步川西北歷山濡谿謂之

濡水也

北過芍陂西與泚水合

泄水自濡谿水安風縣北流注于淠一謂之其濡口

西北入于淮

亂流同國也

肥水出九江成德縣廣陽鄉西

呂忱字林曰肥水出良餘山俗謂之連枷山亦或以爲獨山也北流分爲二水施水出焉肥水又北逕獲城東又北逕荻江東又會施水枝津首受施水經

卷之三十二

五

水於合肥縣城東西流逕成德縣注于肥水也

肥水別北過其縣西北入芍陂

肥水自荻丘北逕成德縣故城西王莽更之曰平阿也又北逕芍陂東又北逕舂馬塘東芍陂瀆上承井門與芍陂更相通注故經言入芍陂矣肥水東北又合閻潤水上承施水於合肥縣北流逕復道縣西水積爲陽湖陽湖水自塘西北逕舂亭南夾橫塘西注宋太始初豫州司馬劉順帥衆八千據其城地以拒劉劭杜叔寶以精兵五千送糧舂亭劉劭破之此塘水分爲澗二洛澗出焉閻漿

水注之水受芍陂陂水上承謂水於五門亭南別爲斷神水又東北流逕五門亭東亭爲衆水之會也斷神水又東北逕神迹亭東又北謂之豪水雖廣異名事實一水又東北逕白芍亭東積而爲湖謂之芍陂陂周一百二十許里在壽春縣南八十里言楚相孫叔敖所造魏太尉王陵與吳將張休文戰於芍陂卽此處也陂有五門吐納川流西北爲香門陂水北逕孫叔敖祠下謂之芍陂瀆又北分爲二水一水東注黎漿漿水東逕黎漿亭南文欽之叛吳軍北入諸葛緒拒之於黎漿卽此水也

水經

卷之三十二

六

東注肥水謂之黎漿水口

又北過壽春縣東

肥水自黎漿北逕壽春縣故城東爲長瀨津津側有謝堂北亭迎送所薄水陸舟車是焉萃止又西北左合東谿谿水引瀆北山西南流逕導公寺西寺側因谿建剎五層屋宇閒敞崇虛携覺也又西南流注于肥水又西逕東臺下臺卽壽春外郭東北隅阿之榭也東側有一湖三春九夏紅荷覆水引瀆城隍水積成潭謂之東臺湖亦肥南播也肥水西逕壽春縣城北右合北谿水導北山泉源

下注漱石頽隍水上長林插天高柯負日出於山林精舍右山淵寺左道俗嬉遊多萃其下內外引汲泉同七淨谿水沿注西南逕陸道士解南精廬臨側川谿大不爲廣小足閒居亦勝境也谿水流注于肥水

北入于淮

肥水又西分爲二水右卽肥之故瀆遏爲船官湖以置舟艦也肥水左瀆又西石橋門北亦曰草市門外有石梁渡此洲洲上有西昌寺寺三面阻水佛堂設三像真容妙相相服精偉是蕭武帝所立

水經

卷之三十二

七

也寺西卽船官坊倉光都水是營是作湖北對八公山山無樹木唯重阜耳山上有淮南王劉安廟劉安是漢高帝之孫厲王長子也析節下士篤好儒學養方術之徒數十人皆爲俊異焉多神仙祕法鴻寶之道忽有八公皆鬚眉皓素詣門希見門者曰吾王好長生今先生無住衰之術未敢相聞八公咸變成童王甚敬之八士並能鍊金化丹出入無間乃與安登山埋金於地白日昇天餘藥在噐雞大舐之者俱得上昇其所昇之處踐石皆陷人馬跡存焉故山卽以八公爲目余登其上人馬

之跡無聞矣唯廟像存焉廟中圖安及八士像皆坐牀帳如平生被服纖麗咸羽扇裙帔巾壺枕物一如常居廟前有碑齊永明十年所建也山有隱室石井卽崔琰所謂余下壽春登北嶺淮南之道室八公石井在焉亦云左吳與王春傅生等尋安同詣玄洲還爲著記號曰八公記都不列其雞犬昇空之事矣按漢書安反伏誅葛洪明其得道事備抱朴子及神仙傳肥水又左納芍陂瀆瀆水自黎漿分水引瀆壽春北逕芍陂門右北入城昔鉅鹿時苗爲縣長是其留犢處也瀆東有東都街街水經

卷之三十二

八

之左道北有宋司空劉劭廟宋元徽二年建于東鄉孝義里廟前有碑時年碑功方創齊永明元年方立沈約宋書言太始元年豫州刺史殷琰叛明帝假勛輔國將軍討之琰降不犯秋毫百姓來蘇生爲立碑文過其實建元四年故吏顏幼明爲其廟銘故佐寵埏爲紗讚夏侯敬友爲廟頌並附刊于碑側瀆水又北逕相國城東劉武帝伐長安所築也堂宇廳館仍故以相國爲名又北出城注肥水又西逕金城北又西左合羊頭谿水水受芍陂西北歷羊頭谿謂之羊頭澗水北逕熨湖左會烽

水瀆瀆受淮於烽村南下注羊頭谿側逕壽春城西又北歷象門白沙門北出金城西門逍遙樓下北注肥瀆肥水北注舊瀆之橫塘爲玄康南路馳道左通船官坊也肥水逕玄康城西北流水北出際有曲水堂亦嬉遊所集也又西北流昔在晉世謝玄北禦苻堅祈八公山及置陣於肥水之濱堅望山上草木咸爲人狀此卽故戰敗處非八公之靈有助蓋苻氏將亡之惑也肥水又西北注于淮是曰肥治也

施水亦從廣陽鄉東南入于湖

水經

卷之三十二

九

施水受肥於廣陽鄉東南流逕合肥縣應劭曰夏水出城父東南至此與肥合故曰合肥闕駟亦言出沛國城父東至此合爲肥余案川亾派別無泐注之理方知應闕二說非實證也蓋夏水暴長施合於肥故曰合肥也非謂夏水自城父東逕合肥縣城南居四水中東又有逍遙津水上舊有梁孫權之攻合肥也張遼敗之於津北橋不撤者兩版權與甘寧蹴馬趨津谷利自後著鞭助勢遂得渡梁凌統被鎧落水後到追亡流涕津渚施水又東分爲二水枝水北出焉下注陽淵施水又東逕東

口戍東注巢湖謂之施口也

沮水出漢中房陵縣淮水東南過臨沮縣界

沮水出東汶陽郡沮陽縣西北景山卽荆山首也
高峰霞舉峻竦層雲山海經云金玉是出亦沮水
之所導故淮南子曰沮出荆山高誘云荆山在左
馮翊懷德縣蓋以洛水有漆沮之名故也斯謬證
耳杜預云水出新城郡之西南發阿山蓋山異名
也沮水東南流逕沮陽縣東南縣有潼水東逕其
縣南下入沮水水又東南逕汶陽郡北卽高安縣
界郡治錫城縣居郡下城故新城之下邑義熙初

水經

卷之三十二

十一

分新城立西表悉重山也沮水南逕臨沮縣西青
谿水注之水出縣西青山山之東有濫泉卽青谿
之源也口徑數丈其深不測其泉甚靈潔至於炎
陽有亢陰雨時以穢物投之輒能暴雨其水導源
東流以源出青山故以青谿爲名尋源浮谿奇爲
深峭盛弘之云稠水傍生凌空交合危樓傾岳恒
有落勢風泉傳響於青林之下巖猿流聲於白雲
之上遊者常若目不周翫情不給賞是以林徒栖
託雲客宅心泉側多結道士精廬焉青谿又東流
入于沮水沮水又屈逕其縣南晉咸和中爲沮陽

郡治也沮水又東南逕當陽縣北縣城因岡爲阻北抗沮川其故城在東一百四十里謂之東城在綠林長坂南長坂卽張翼德橫矛處也沮水又東南逕驢城西磨城東又南逕麥城西昔關雲長詐降處自此遂叛傳云子胥造驢磨二城以攻麥邑沮水又南逕楚昭王墓東對麥城故王仲宣之賦登樓云西接昭丘是也沮水又南與漳水合焉又東南過枝江縣東南入于江沮水又東南逕長城東又東南流注于江謂之沮口也

水經

卷之三十二

十一

漳水出臨沮縣東荆山東南過蓼亭又東過章鄉南荆山在景山東一百餘里新城沛鄉縣界雖羣峰競舉而荆山獨秀漳水東南流又屈西南逕編縣南縣舊東北一百四十里高陽城西南移治許茂故城城南臨漳水又南歷臨沮縣之彰鄉南昔關羽保麥城詐降而遯潘璋斬之於此漳水又南逕當陽縣又南逕于麥城東王仲宣登其東南隅臨漳水而賦之曰夾清漳之通浦倚曲沮之長洲是也漳水又南滄水注之山海經曰滄水出東北宜諸之山而流注于彰水

又南至枝江縣北烏扶邑入于沮

地理志曰禹貢東條荆山在臨沮縣之東北漳水所出東至江陵入楊水注于沔非也今漳水於當陽縣之東南一百里餘而右會沮水也

夏水出江流于江陵縣東南

江津豫章口東有中夏口是夏水之首江之汜也屈原所謂過夏首而西浮顧龍門而不見也龍門卽郢城之東門也

又東過華容縣南

縣故容城矣春秋魯定公四年許遷于容城是也

水經

卷之三十二

十二

北臨中夏水自縣東北逕成都郡故城南晉永嘉中西蜀阻亂割華容諸城爲潁王都夏水又逕交阯太守胡寵墓北漢太傅廣身陪陵而此墓側有廣碑故世謂廣冢非也其文言是蔡伯喈之辭歷范西戎墓南王隱晉書地道記曰陶朱冢在華容縣樹碑云是越之范蠡晉太原地記盛弘之荊州記劉澄之記並言在縣之西南郭仲產言在縣東十里檢其碑題云故西戎令范君之墓碑文缺落不詳其人稱蠡是其先也碑是永嘉二年立觀其所述最爲究悉似親逕其地故違衆說從而正之

水又東逕監利縣南晉武帝太康五年立縣土卑下澤多陂池西南自州陵東界逕于雲杜沌陽爲雲夢之藪矣韋昭曰雲夢在華容縣按春秋魯昭公三年鄭伯如楚子產備田具以田江南之夢郭景純言華容縣東南巴丘湖是也杜預云枝江縣安陸縣有雲夢蓋跨川亘隰兼苞勢廣矣夏水又東夏楊水注之水上承楊水於競陵縣之柘口東南流與中夏水合謂之夏楊水又東北逕江夏惠懷縣北而東北注

又東至江夏雲杜縣入于沔

水經

卷之三十

十三

應劭十三州記曰江別入沔爲夏水源夫夏之爲名始於分江冬竭夏流故納厥稱既有中夏之目亦苞大夏之名矣當其決水之所出謂之賭口焉鄭玄注尚書滄浪之水言今謂之夏水來同故世變名焉劉澄之著永初山川記云夏水古文以爲滄浪漁父所歌也因此言之水應由沔今按夏水是江流沔非沔入夏假使沔注夏其勢西南非尚書又東之文余亦以爲非也自賭口下沔水通兼夏目而會于江謂之夏沔也故春秋左傳稱吳伐楚沈尹射奔命夏沔也杜預曰漢水曲入江卽夏

口矣

羌水出羌中叅糧

彼俗謂之天池白水矣地理志曰出隴西羌道東南流逕宕昌城西北去天池五百餘里水又東南逕宕昌婆川城東南北注羌水昔姜維之寇隴右也聞鍾會入漢中引還知雍州刺史諸葛緒屯橋頭從此谷將出北道緒邀之此路繼更從此道渡橋頭入劔閣緒追之不及羌水又東南陽部水注之水發東北陽部谿西南逕安民戍又西南注羌水又東南逕武階城西南又東南葭蘆城西羊

水經

卷之三十二

十四

湯水入焉水出西北陰平北界湯谿東南逕北部城北又東南逕三部城南東南右妾水合傍西南出卽水源所發也羌水又逕葭蘆城南逕餘城南又東南左會五會水水有二源出南北五部谿西南流合爲一水屈而東南注羌水羌水又東南流至橋頭合白水東南去白水縣故城九十里又東南至廣魏白水縣與漢水合又東南過巴郡閬中縣又南至墊江縣東南入于江涪水出廣魏涪縣西北

涪水出廣漢屬國剛氏游徼外東南流逕涪水西

王莽之統睦臧宮進破涪城斬公孫恢於涪自此水上縣有潺水出潺山水源有金銀礪洗取火合之以成金銀潺水歷潺亭而下注涪水涪水又東南逕縣竹縣北臧宮溯涪至平陽公孫述將王元降遂拔綿竹涪水又東南與建始水合水發平洛郡西谿西南流屈而東西流入於涪涪水又東南逕江由戍北鄧艾自陰平景谷步道縣兵束馬入蜀逕江由廣漢者也涪水又東南逕南安郡南又南與金堂水會水出廣漢新都縣東南流入涪涪水又南枝出焉西逕廣漢五城縣爲五城水又西

水經

卷之三十二

十五

至成都入于江

南至小廣魏與梓潼合

小廣魏卽廣漢縣地王莽更名曰廣信也

梓潼水出其縣北界西南入于涪

故廣漢郡也公孫述改爲梓潼郡劉備嘉霍峻守葭萌之功又分廣漢以北別爲梓潼郡以峻爲守縣有五女蜀王遣五丁迎之至此見大虵入山穴五丁引之山崩壓五丁及五女因是山爲五婦山又曰五婦候馳水所出一曰五婦水亦曰潼水也其水導源南逕梓潼縣王莽改曰子同矣自縣西

涇涪城東又南入于涪水謂之五婦水口也
又西南至小廣魏縣南入于墊江

亦言涪水至北入漢水昔岑彭與臧宮自江州從
涪水上亦謂之爲內水也涇墊江公孫述令延岑
盛兵於沈水宮左步右騎夾船而進勢動山谷大
破岑軍斬首溺水者萬餘人水爲濁流沈水出廣
漢縣下入涪水也

涔水出漢中南縣東南旱山北至沔陽縣南入于沔
涔水卽黃水也東北流涇城固南城北城在山上
或言韓信始立或言張良創築未知定所制矣義

水經

卷之三十二

十六

熙九年索遐爲果州刺史自城固治此故謂之南
城城周七里今澗帶谷絕壁百尋北谷口造城東
門傍山尋澗五里有餘盤道登陟方得城治城北
水舊有桁北渡涔水水北有趙軍城城北又有桁
渡沔取北城城卽大城固縣治也黃水右岍有悅
歸館涔水歷其北北至沔陽左沔爲三水口也

水經第三十二